

四庫全書

史部

欽定四庫全書

史部

徐霞客遊記卷五上

詳校官太常寺少卿臣陳桂森

編修臣程嘉謨覆勘

總校官庶吉士臣朱銓

校對官檢討臣季學錦

謄錄監生臣左熙世

欽定四庫全書

徐霞客遊記卷五上

明 徐宏祖 撰

西南遊日記七

貴州

戊寅年三月二十七日自南丹北鄙岬歹村易騎入重
山中漸履無人之境五里踰山界嶺

南丹下
司界

又北一里

踰石隘是為艱坪嶺其石極嵯峨其樹極蒙密其路極
崎嶇黔粵之界以此而分南北之水亦由此而別然其

水亦俱下都泥則石隘之脊乃自東而西度盡於巴鷲之境而多靈大脊猶在其東也北下一里就峽西行一里始有田塍又半里峽轉北塢始大開又北一里有村在西塢中曰由夷此中諸塢四面皆高不知水從何出然由夷村南石壁下有洞東向細流自畦中淙淙入透山西而去固知大脊猶在東也至此南丹差騎辭去由夷人始許夫騎久乃不至促久之止以二夫負擔去余獨坐其欄從午至暮始得騎西北二里至山寨則寨人

已送担亦前去乃由其東上嶺越脊北下一里行壑中
又北一里再越嶺脊下行峽中壑圓而峽長南北向皆
有脊中亘無洩水之隙而北亘之脊石齒如鋸橫鋒豎
鐐莫可投足時已昏黑躍馬而下此騎堪托死生也越
脊直墜峽底踰所上數倍始知前之圓壑長峽猶在半
山也峽底有流從南脊下溢遂滔滔成流隨之西向行
共里許有村在南山麓担夫已換去又騎而西半里担
夫又已去盖村人恐余止其家故亟換之行而又無騎

換騎夫不肯前予強之暗行西北半里有溪自東而西橫堰其中左右淵深由堰上北度馬蹄得得險甚又西轉過一村半里由村西而北向踰嶺始與雙担同行暗中呼聲相屬不辨其為石為影也共二上二下遂行田塍間共五里過一寨排門入居人頗盛半里復排一門出又行田塍中一里半叩門入舊司門以內茅舍俱閉莫為啟久之守一啟戶者無茅無飯而臥上下二司者即豐寧司也瀕南界者分為下司與南丹接壤二司

皆楊姓兄弟也而不相睦今上司為楊袖強而有制道
路開治盜賊屏息下司為楊國賢地亂不能轄民皆標
掠三里之內靡非賊窟其東有七榜之地地寬而渥鴛
鷺尤甚其叔楊雲道聚衆其中為亂首人莫敢入 舊
司者下司昔日司治也為上司所破國賢移居寨上 豐
寧二司皆貴州都勻府屬其兄弟相 寨在南山之麓與
賊而莫問豈羈縻之道固應然耶

舊司南北相對中隔一塢然亦無奇險也

二十八日平明起雨霏霏下余令隨夫以鹽易米而炊

余以刺索夫於南寨國賢避不出托言與上司不合不敢發夫止許護送者兩三人送出境余飯而待之送者亦不至乃雇夫分肩行李從舊司北向踰嶺共三里餘下至餓鬼橋有小水自東北注西南小石梁跨其上禦人者每每橫行於此又北二里踰嶺已為上司界下嶺二里有村在西塢而路東有楓木樹對之又東北踰嶺二里有村在東塢其前環山為壑中窪為田村倚東峯有石崖當村後路循西嶺與村隔壑相向始敢對之息

肩又西北踰嶺二里轉而西南于是峽大開南北相向
南山下村居甚稠北山則大路倚之西行五里路復西
北踰嶺蓋此地大山在東北路俱緣其西南上雖有升
降然俱上多下少逶迤以升者也又西北二里踰嶺路
北有峰迴亘層疊儼若天盤龍髻崖半有洞門西向數
十家倚之路乃北轉又一里越其西岡北向下西岡者
大山分支西突為盤髻峰其下橫岡西度者也西岡之
北山又東西排闥北望西山一圓高挿峰頭矗然倚天

之柱其北石崖迴沓即上司治所托也東界土山即路
所循而行者共北五里路與西界矗柱對又北二里忽
山雨大至担夫停擔各牽笠蔽雨余持傘亦蔽一挑忽
有四人持鏢負弩懸劍橐矢自後奔突而至兩人趨余
傘下一人趨顧僕傘下一人趨一夫笠下皆勇壯兇獍
似避雨又似夾持余甚恐問余何往余對以都勻問余
求烟余對以不用久之雨不止而勢少殺余曰可行矣
其人亦曰可去余以為將同往而前者及予行而彼復

止余益知其必非良人然入其吻而不下咽其心猶良也更北半里轉而西又一里餘有營當兩界夾中阜上壁壘新整由其下又西一里入上司南門有土垣環繞門內即宿舖

江西人自下司至此居舍中各半土半欄

時雨過街濕余乘濕

履遂由街北轉而西有巨塘滙其內西築堤為堰鵞為馳道甚整又北半里直抵囤山東麓北向入一門有石隙一縷在東麓下當其盡處鑿孔如盂深尺許可貯水一斗囤上下人俱以盞候而杓之蓋其水甘冽迥異他

水余杓而嘗之果不虛也由此循園麓轉入北峽峽中
居人甚多皆頭目之為心贅寄者又編竹架園於峽中
由北峽西向行已入園後有脊自西北連屬於園乃園
之結蒂處也脊東峽中有洞倚園麓其門北向甚隘而
深有二人將上園余問此洞深否云其洞不深上至園
半有大洞頗深而有水須以炬入由下仰眺園上居舍
纍纍惟司官所居三四層皆以瓦覆以堊飾園險而居
整反出南丹上也余乃隨其人拾級上園其級甚峻而

甃鑿開整竭蹶而上共半里折而東有樓三楹跨路間
乃圉半之隘闔也洞在中之後前為樓所蔽不可見有
男婦各一炊中楹下二人指余入遂登圉去余索炬於
炊者則楹後即豬欄馬棧踐之下洞洞門北向窪墜而
下先是令一夫隨行至脊下不敢登予乃獨上然圉上
之形可以外瞭而見惟此洞為樓掩非身至不知也仍
由舊路里餘返宿舍則已薄暮矣炊飯亦熟遂飡而臥
二十九日由上司出南門仍渡門東小水溯之東北行

一里躡土山而上四里踰土山西度之脊其西石峰突兀至此北盡踰脊西北行一里半嶺頭石脊復夾成隘門兩旁石骨嶙峋由隘西出轉而東北下半里下抵塢中又北一里復越土山西下脊是為上司獨山州界于是下嶺循東山行又二里有村在西山塢中為苴查村其處東西兩界皆土山中開大塢有水自北來界於塢中遶苴查之東乃西向破峽去循東界山溯水北向行又三里水分二支來一自西北一自東北如了字會於

中枝山盡處西北者較大路溯東北行一里半始渡之
于是中支山東麓得潭子窰村乃土官蒙氏之族也村
北溪中在碎石時涸時溢又東渡之東北上岡頭共里
許有土環遺址名曰關上而無居舍又東北一里水盡
塢窮于是躡嶺其嶺甚峻三里北踰其脊隘中砥石如
鋪兩旁有屹立峰是名雞公關其脉自獨山州西北繞
州治東南過此又東南度六寨之東而下蠻王峰者也
脊西南水下苴查而入都泥脊東北水由合江州下荔

波而入龍江從脊東北眺則崇山蜿蜒列屏於前與此山遙對成兩界中夾大塢自西北向東南下山即轉北行一里抵塢轉東即有小水東南下又東一里踰陟崗阜忽有溪自西北注東南水于此復出為龍江上流矣渡溪東上于是升陟坡壠東北行塢中五里有數家之村在東北山下從其前復轉入西峽北一里過一脊始北向下嶺其下甚深半里抵其麓始知前所行俱在山上也又北行塢中一里半有大溪汪然自西峽層山中

出東注而去亦由合江州而下荔波思恩者歷石壑而

渡其北又緣西界交隴共里為羊角寨

乃蒙氏之砦
也在西山麓

又

北三里有小水自西坡東注涉之又北二里入獨山州

之南隘門其州無城一土知州一明知州土官蒙姓所

屬皆土人

即苗仲

明官多缺以經歷署篆所屬皆客戶予

所主者江西南昌人黃南溪也其人忠厚長者家有樓

可棲蓋是州雖無城而夾街樓房連屬俱有瓦蓋無復

茅欄牛圈之陋矣

三十日平明飯出獨山州北隘門西北向循西界山行
六里有小水亦自西坡東注涉之北又二里北塢漸窮
山脊自東界西度南轉乃路轉東北澗中小水北流渡
澗循東界山峽間東北上又二里有水溢路旁石穴間
甚冽其側有蒙氏修路碑從此扳石磴東北上嶺雨大至一里半
北登嶺隘是嶺由東南度西北乃祖山從其東北分裂
衆枝其直東而去者為黎平平崖之脊東南分支而下
者為黎波羅城之派西北分支而下者度此稍北即西

轉南走而環於獨山之西度雞公嶺而南為蠻王多靈

之派

獨山州南二十里有山尖起立於衆山之中是名獨山州之所以得名也

又東北行山

峽間乃下共二里有澗自東谷走深崖中兩崖石壁甚
逼澗嵌其間甚深架石梁其上為深河橋過橋復躋崖
而上登嶺而北有小水自東北瀉石崖而下涉之復升
嶺共一里遂由峽中北行又二里乃下東北行下壑中
有村在東山下由其前少轉西北共二里有溪自東北
來渡之溯其西岸東北踰嶺二里一水自東北來一水

自西北來東北者較大於西北于是涉西北水緣中支
山而上東北三里而登其崗飯於崗上乃稍下又北踰
嶺而下夾塢中共三里又有溪自南峽北向下墜深
潭中潭小而高此西北小溪之源也又北踰嶺一里半
下渡深壑中有澗自西南峽中來至此南向西轉此東
北小溪之源也涉之西南登嶺半里而上循嶺半西南
行二里過兔塢西出嘉坑關隨小水西下由夾中行五
里兩夾山多石崖突兀路側有泉湧穴出又西二里水

墜南峽去路踰北坳上有寨在東崗之巔由其西北度脊南北俱有窪中墜環塍為田直抵其底水皆自底西向透石穴者也又西踰嶺一里出隘口其上石骨稜峭皆作噓雲裂萼之勢又西北下峽中一里轉而西半里西出峽是為獨山州與胡家司分界

胡家司即都勻長官司

于是

山開南北洋中有大溪自北而南是為橫梁循溪東轉南半里抵南崖崖下有賣粉為餉者以鹽少許易而食之隨溪南岸西行道路開整不復以蜀道為苦溪北有

崇廟在高樹間人家田隴屢屢從斷岬而出共六里過
塢裏村又西一里其水南曲乃西渡之從溪西岸南行
半里為邛母村由村前西轉塢復東西開而其村重綴
崗阜瓦舍高聳想亦胡家司之族目也西二里其水北
曲復西渡之又西北一里其水西曲又北渡之從北岸
懸崖西行一里半有水自西來會乃麥冲河也即溯河
西行二里入麥冲堡南隘門而宿是晚雷雨大作徹夜
不止

四月初一日平明起雨漸止飯間聞其西有桃源洞相
去五里須秉炬深入中多幡蓋纓絡之物覓主人導之
不得曰第往關上可西往也遂北向出隘門溯溪東岝
行忽石壁湧起岸東勢極危削溪漱之南路溯之北咫
尺間人倚穹崖下循迅派神骨俱悚三里轉入東塢其
北有小峰立路隅當麥冲河南下之衝有岩北向曰觀
音洞又北半里曰麥冲關問所謂桃源洞者正在其直
西大峯之半相望不出四里外關之東有真武閣南向

正與觀音洞門對乃停行李於閣中覓火炬於僧將往探之途遇一老者曰此洞相去不遠但溪水方漲湍急不可渡雖有導者不能為力而況漫試乎余乃廢然而返取行李西南越而下抵河東岸溯之北共一里溪自西北山腋來路從東北山腋上遂與麥冲河別當坡路潦跡間有泉汎汎從下溢起孔大如指以指探之皆沙土隨指而溷指去而復溢成孔乃氣機所動而水隨之非有定穴也一里轉上後峽遂向東入又一里峽更東

去路復從北峽上其處石峰嶙峋度脊甚隘越隘北下

塢中被壠盈塢小麥青青蕎麥熟粉花翠浪從此遂不

作粵西燕態

粵西獨不純麥

脊東西亂水交流猶俱下麥冲者

又東一里轉而北有塢南北開洋其底甚平犁而為田

此處已用牛耕不若六寨以南之用概耨矣

波耕水耨盈盈其間水皆從崖

坡瀉下而不見有澮濬之跡二里有村頗盛倚西峰下

曰普林堡又北一里踰嶺而上石峰復度峽而下轉而

東平行石嶺間一里東下盤窩中有小石峯圓如阜盤

托而出路從之徑窩東入峽一里復北向嶺一里遂踰
土脊之上此脊當為老龍之幹西自大小平伐來東過
谷蒙包陽之間又東過此東南抵獨山州北又東為黎
平平崖之脊而東抵興安南轉分水龍王廟者也越脊
北下峽壁甚隘一里下行峽中有水透西南峽來入北
隨峽去渡之傍澗西涯行有歧路溯水西南峽則包陽
道通平浪平洲六洞者也隨水東北行峽中又三里轉
而東其峽漸開有村在南山間曰下石堡又北二里過

一巨石橋澗從橋下西北墜深峽中而去路別之東北
踰嶺升降二重又二里越嶺下則東南山塢大開大溪
自西北破峽出湯湯東去是曰大馬尾河以暴漲難渡
由溪南循山崖東行溪流直搗崖足一里東抵堡前觀
諸渡者水湧平胸不勝望洋之恐坐久之乃解衣泅水
而渡從北岸東向行水從東南峽去別之乃東北踰嶺
而下共三里東渡小馬尾河復東北升嶺一里半越嶺
脊東下一里半出山峽山乃大開成南北塢東西兩界

列山環之大河湯湯流其間自北而南溯溪西岸循西
界山北行一里路傍即有水自西峽南向入溪涉之又
北二里有石梁跨一西來溪上度之從梁端循峽西入
是為胡家司即都勻長官司也以名同本郡故別以姓
稱又北一里有村在西山崖上曰黃家司乃其副也又
北行田塍間五里度西橋又北半里入小西門是為都
勻郡城宿逆旅主人家為沈姓亦江西人

初二日晨起作書投都勻四尊張

勉行四
川人

乃散步東入

郡堂堂乃西向蟒山者又東上東山麓謁聖廟見有讀書廡東者問南臯鄒總憲成都時遺跡曰有書院在東門外內問郡志其友歸取以示甚略而不詳即大小馬尾之水不書其發源并不書其所注其他可知載郡八景俱八寸三分帽子非此地確然特出之奇也此地西門大溪上有新架石梁壘石為九門甚整橫跨洪流乃不取此何耶

都勻郡城東倚東山西瞰大溪有高岡自東山西盤而

下臨溪塹溪自北來西轉而環其東城圓亘岡上南北各一門西有大小二門東門偏於山之南城後環東山之巔其上有樓可以舒眺

郡西對蟒山為一郡最高之案郡治文廟俱向之其南峯旁聳有梵宇在其上須拾級五里而上以飯後雨作不及登謂之蟒者以峯頭有石脊蜿蜒如巨蛇今志改為龍山

九龍洞在城東十里按一統志有都勻洞在都勻長官

司東十里前門北向後門南向當即此洞今志稱為仙人洞二下注云一在城東一在城西殊覺憤憤

水府廟在城北夢遇山大溪南下橫其前一小溪西自蟒山北直東來注下有白衣閣倚崖懸危壁上凭臨不測上有梵音洞西向為門洞無他致止云其中石佛自土中出者為異耳

初三日下午自都勻起程二十里至文德宿

初四日三十里麻哈州又十里乾溪宿

初五日麻哈大堡又十里乾堪哨又十五里平越衛

初六日歇平越

初七日宿店

初八日雇貴州夫行至崖頭宿

初九日新添飯至楊寶宿

初十日龍里宿

十一日二十里至鼓角三十里至貴州

十二日止貴州游古佛寺

十三日止貴州寓吳慎所家

十四日晨飯於吳遂出司南門度西溪橋西南向行五

里有溪自西谷來東注入南大溪有石梁跨其上曰太

子橋

此橋謂建文君得名然何以太子之也

橋下水湧流兩厓石間衝突

甚急南來大溪所不及也渡橋溯南來大溪又西南三

里有一山南橫如列屏於前大溪由其東腋北出路從

其西腋南進又南行峽間二里歷東山之嘴曰岷堰塘

其西南有兩峰駢起其東即屏列山之側也又三里過

雙駢東麓而出其南漸聞溪聲遙沸東望屏列之山南
遂成峽溪形復自南來搗峽去即出其東北腋之上流
矣第路循西界山椒溪沿東界峰麓溯行而猶未覩面
耳又南二里始見東溪汪然有村在東峰之下曰水邊
寨又南三里曰大水溝有一二家在路側前有樹可憩
焉又南漸升土阜遂東與大溪隔已從嶺上平行五里
北望雙駢又三分成筆架形矣南行土山峽中又一里
出峽循折而東則大溪自西南峽中來至此東轉抵東

峯下乃折而北去有九輦巨石梁南北架溪上是為華
狔獐橋乃飯於橋南鋪肆中遂南向循東峯之西而行
皆從土坡升陟路坦而寬九里見路出中岡路東水既
東北墜峽下路西水復西北注坑去心異之稍上岡頭
則路東密箐廻環有一家當其中其門西臨大道有三
四人憩石畔因倚杖同憩則此崗已為南北分水之脊
矣蓋東西兩界俱層峰排闥而此崗中橫其間為過脉
不峻而坦其南即水南下矣是云獨木嶺

或曰頭目嶺
昔金筑司在

西界尖峰下而此
為頭目所守處

從嶺南下依東界石山行五里復升

土嶺漸轉東南嶺頭有一窪中墜從其東又南向而上
共二里乃下一里則有溪自西北峽中出至此東轉有
石梁跨之是為青崖橋水從橋下東抵東界山乃東南
注壑去經定番州而南下泗城界入都泥江者也于是
又出嶺南矣度橋而南半里入青崖城之北門其城新
建舊紆而東今折其東隅而西就尖峯之上城中頗有
瓦樓闌闌焉是日晴霽竟日夜月復皎

青崖屯屬貴州前衛而地則廣順州所轄北去省五十里南去定番州三十五里東北去龍里六十里西南去廣順州五十里有溪自西北老龍脊發源環城北東流南轉是貴省南鄙要害今添設總兵駐扎其內

十五日昧爽出青崖南門由岐西向入山峽

南遵大路為定番州

道五里折而南又西南歷坡阜共五里有村在路北山下曰翁樓木樹蒙密小水南流從西入山峽西山密樹

深箐與貴陽四面童山迥異

自入貴省山皆童然無木而貴陽尤甚

西北

入峽三里遂西上陟嶺一里踰嶺西下半里有泉出路
旁土中其冷徹骨南下瀉壑去又西下半里有澗自此
峽來橫木橋於上其水南流去路西度之復北上嶺一
里踰脊西有泉淙淙隨現隨伏西北行兩山夾中夾底
平窪犁而為田而中不見水又西北半里抵西脊脊東
復有泉淙淙亦隨現隨隱蓋此中南北兩界俱穹峰而
東西各亘橫脊脊中水皆中墜不見窪底故窪底反燥
而不瀦越西脊而下西北二里路北有懸泉一縷自山

脊界石而下路南忽有泉聲淙淙成澗想透穴而出者
半里轉而西行又半里得一村在北山下曰馬鈴寨路
由寨前西向行忽見路南澗已成大溪隨之西半里又
有大溪自西峽來二溪相遇遂合而東南注壑去此水
經定番州與青崖之水合而下都泥者也于是溯西來
大溪之北岸又西向行二里為水車壩壩北有土司廬
姓者倚廬北峰下壩南有場在阜間川人結茅場側為
居停焉壩乃自然石灘橫截澗水飛突其上而上流又

有巨木橋架溪南北其溪乃自西廣順來

廣順即金筑安撫司乃萬

歷二十五年改
為州添設流官

由溪北岸溯流入為廣順州道由溪東

岸踰嶺上為白雲山道隨溪東南下為定番州道乃飯
於川人旅肆送火錢辭不受遂西南一里踰嶺又行嶺
夾中一里半乃循山南轉半里又東轉入峽半里峽窮
乃東南扳隘上其隘蘿木蒙密石骨逼仄半里踰其上
又東南下截壑而過半里復東南上其嶺峻石密叢更
甚半里又踰嶺南下隨塢南行一里是為八壘其中東

西皆山南北成壑亦有溪坎墜成智井而南北皆高水
不旁泄者也直抵壑南則有峰橫截壑口西駢隘如闕
東聯脊成嶺乃東向陟嶺上一里踰其脊是為永豐庄
北嶺即白雲山西南度脊也乃南向下山又成東西塢
有村在南山下與北嶺對是為永豐庄從塢中東向行
二里得石磴北崖上遂北向而登半里轉而西半里又
折而北皆密樹深叢石級迤邐有巨杉二株夾立磴旁
大合三人抱西一株為大傷其頂乃建文君所手植也

再折而西半里為白雲寺則建文君所開山也前後架閣兩重有泉一坎在後閣前楹下是為跪杓泉下北通閣下石竅不盈不涸取者必伏而杓故曰跪云神龍所供建文君者中通龍潭時有雙金鯉出沒云由閣西再北上半里為流米洞洞懸山頂危崖間其門南向深僅丈餘後有石龕可傍為榻其右有小穴云為米所從出流以供帝者而今無矣左有峽高迸而上透明窻中架橫板猶云建文帝所遺者皆神其跡者所托也洞前凭

臨諸峰翠浪千層環擁迴伏遠近皆出足下洞左構閣

祀建文帝遺像

閣名潛龍勝跡像昔在佛閣今移置此

乃巡方使胡平所

建前瞰遙山右翼米洞而不掩洞門其後即山之絕頂

逾而北開坪甚廠皆層簷聳木虧蔽日月列徑分區結

靜廬數處而南京井當其中石脊平伏嶺頭中裂一隙

南北橫不及三尺東西濶約五尺深尺許南北通竅不

可測停水其間清冽異常而不減不溢靜室僧置瓢杓

之予初至見有巨魚戲水面見人掉入竅去波湧紋激

半晌乃定穴小魚大水停峯頂亦一異也以其側有南京僧結廬住靜故以南京名今易老僧乃北京者而泉名猶仍其舊也是日下午抵白雲菴主僧自然供飧後即導余登潛龍閣憩流米洞命閣中僧導余北踰脊觀南京井北京老僧迎客坐廬前執地種蔬有蓬蒿菜黃花滿畦鶯栗花殷紅千葉簇朶甚巨而密豐艷不減丹藥也四望喬木環翳如在深壑不知在衆山之頂幽曠交擅亦山中一勝絕處也對談久之薄暮乃返自然已

候於菴西復具餐啜茗移坐菴後石壁下是日自晨至
暮清朗映徹無片翳之滓至晚陰雨四合不能於葦玉
峯頭逢瑤池夜月為之悵然

十六日夜聞風雨聲抵曉則風霏霏予為之遲起飯後
坐小窻待霽欲往探龍潭零雨不休再飯乃行仍從潛
龍閣踰嶺至南京井從岐東北入深箐中聳木重崖上
下窈渺穿窬透壁非復人世共五里則西崖自峯頂下
嵌深墜成峽中窪停水淵然深碧陷石脚而入不盈不

洞真萬古潛淵千峯閼壑也其峽南北約五丈東西約丈五東崖低陷空下者約三丈西崖聳陷空下者十數丈水中深不可測而南透穴彌深蓋穿山透腹一峯中涵直西南透為南京井東南透為跪杓泉者也崖上喬幹密枝漫空籠罩又東北扳崖東南度壑皆窈渺之極壑東有遺茅一龕度木橋而入為兩年前匡廬僧住靜處今茅空人去將度木披之而山雨大作循舊徑返深藹間落翠紛紛衣履沾透再過南京井入北僧龕僧鑰

扉往白雲惟雨中鶯粟脉脉對人空山嬌艷宛然桃花
洞口逢也還踰潛龍閣自然已來候閣旁遂下菴淪茗
炙衣晚飧後雨少霽復令從導由菴東登嶺角循之而
北一里出其東隅近山皆伏其下遙山則青崖以來自
龍里南下之支也稍北下深木中度石隙而上得一靜
室其室三楹東向寥廓室前就石為臺綴以野花室中
編竹繚戶明潔可愛其處高懸萬木之上下瞰箐篁叢
疊如韭畦沓沓隔以懸崖間以坑塹可望而不可陟故

取道必迂從白雲蓋與潛龍閣後北坪諸靜室取道皆然更無他登之捷徑也此室曠而不襍幽而不闕呼吸通帝座寤寐絕人寰洵栖真之勝處也靜主號啟本真人與一徒同栖而北坪則獨一老僧也白雲之後共十靜廬因安氏亂各出山去惟此兩廬有栖者十二廬旁各有坎泉供勺因知此山之頂皆中空醞水停而不流又一奇也晚白雲暮雨復至自然供茗爐旁篝燈夜話半晌乃臥

十七日晨起已霽而寒悄頗甚先是重夾猶寒余以為陰風所致有日當解至是則日色皎然而寒氣如故始知此中夏不廢爐良有以也

白雲山初名螺擁山以建文君望白雲而登為開山之祖遂以白雲名之一統志有螺擁之名謂山形如螺擁而不載建文遺跡時猶諱言之也土人訛其名為羅勇今山下有羅勇寨土人居羅勇而不知其為螺擁土人知白雲山而不知即螺擁山夷地無徵滄桑轉盼如此

白雲山西為永豐北嶺即余來所踰嶺也東則自滇僧
靜室而下即東墮頽然下對青崖皆為絕壑前則與南
山夾而成塢即余東北來登級處也後則從山頂窮極
窈渺北抵龍潭下為後塢即余來時所經嶺南之八壘
者也此其近址也其遠者東抵青崖四十五里西抵廣
順三十里東南由翁貴抵定番州三十里北抵水車壩
十五里

白雲山中有元色白色諸猿每六六成行輪朝寺下

僧據

言如此余早
晚止聞其聲
又有菌甚美大者出龍潭後深箐仆木間

玉質花腴朶徑尺即天花菜也

又有小者名八担紫土人呼為茅菓雲南甚多

自青崖而西有司如之流其西又有馬鈴寨東溪其西
又有水車壩西溪皆南流合於定番而皆自石洞中湧
出至白雲南又有翁貴羅鼓洞水及撒崖水皆為白雲
山腹下流皆合於定番州其南又有水埠龍
在白雲南三十里有
仙人洞其北五里又
有金銀洞白牛崖
其上流亦自洞湧出而南注於都
泥江則此間水無非洞出者矣

東南山脊蜿蜒自龍里西南分支南下迴繞如屏直抵泗城界此即障都泥而南趨者其山迴環而東中圍丹平平州諸司即麥冲橫梁諸水南透六洞而下都泥以此支環之也

老龍之脊自廣順北東序上寨嶺東過頭目嶺又東北過龍里之南又東過貴定縣西南又東過新添衛之杪木寨乃東南轉環蟒山之南東過為普林北嶺又東抵獨山州北乃東趨黎平南境而東度沙泥北嶺以抵興

安分水

貴州東三里為油鑿關其水西流西十里為聖泉北嶺其水東流北十五里為老鴉關其水南流為山宅溪南三十里為華狔獠橋其水北流四面之水南最大而西次之北穿城中又次之東為最微俱合於城南薛家洞東經襄陽橋東北抵望風臺從其東又稍北入老黃山東峽乃東搗重峽而去當與水橋諸水同下烏江者也十八日辭自然師下山一里半抵山麓西一里半有數

家在南麓為永豐莊皆白雲寺中佃戶也由其前西向尖峰峽中去是為廣順州道由其前西去南轉是為定番州道由其前北向踰嶺是為土地關道先是自然為余策所從曰由廣順安順西出普定其道近而兩順之

間

廣順知州栢兆福欲歸臨清安順土知州近為總府禁獄中

苗蠻伏莽可慮不若

西北由東基出平壩抵普安多行四十里而地僻苗馴可免意外余思由兩順亦須三日行走平壩路迂而行多亦三日可達普安遂不西行而北踰嶺其嶺即白雲

山之西陲也共一里越其北有塢東北向東南界即白
北龍潭之後西北界即南嶺所環轉北而東屬於龍潭
東峰之下者其中平塢一壑南北長二里水亦中窪下
墜兩旁多犁為田是名八壘北竟塢中乃北踰石嶺共
半里下北渡獨木橋有塢自東北向西南是為乾溝橫
度之北上半里是為土地關下關半里鑿石坎停細流
一盂曰一碗水行者以口就而啜之又西向一里半出
峽由其北循山東北轉為水車壩道由其西截塢直行

一里半有村在北山下是為谷精從村西轉又截塢而
下一里轉入山峽有溪自南而北即從北峽轉而東去
是水車壩之上流也其流自廣順州東北老龍南谷來
者渡之又西越山坡旋下泝西來小流入其流東注南
來大溪即同之直向南去路溯溪南山峽逼仄時扳石
上下二里餘乃西渡此水從其北西向又半里其北削
崖高穹有洞上綴其門南向遂從其下西踰坳間石
骨稜厲逼屬南山迴視前溪在其下不知從何而出即

水車壩水亦流自穴中者不知即指此水抑謂南來大
溪也踰坳西稍下約一里有路交為十字其南北皆從
山嶺上下有石磴逶迤乃廣順達貴省道也其東西即
踰坳而西下峽中者從峽西下半里又聞水聲潺潺有
水深自坑底東注坳下信乎即坳東透穴之水矣溯之
山塢復開有村在西山下是為東基下寨從其前轉而
東北則下寨山之北突也循之一里又西北轉則西界
山純削為石而東界則土脊迤邐又北二里有村當北

岡之上是為東基上寨寨中懸小支盡處皆瓦房非他
苗寨所及由寨西北向半里有泉飛流注腋由寨東而
出寨當其中小支左右皆崇岡峻峽寨後復環一塢良
疇層倚焉皆此泉之所潤而透於東坳之下者也蜿蜒
上躋者一里從嶺上復北踰頂者半里下至塢中望北
峯夾立甚高其下有塢自西北來者即上寨後注腋之
水從水車壩而南去者也其下有塢向東北墜者即塢
中東分之水從華犵狓橋而北出者也其塢甚平中犂

為田從田塍北上又東北升嶺半里踰峰頭而飯于是
北望遙山開伏數里外石峯屏列俱不能與此山並峻
矣北下甚坦半里路分兩岐一從東北行者為野鴨塘
出平壩道遂從西北下山一里抵山下沿陂陀西行漸
有小水俱從東北去二里復溯水入峽一里復陟嶺而
上又二里遂西過野鴨塘有堡數十家在南山下其前
有塘瀦水直逼北山然東西皆高不知從何而洩即所
謂野鴨塘是也遠堡前西南行半里望西北山崖間有

洞高穹其前隴復有洞伏於下乃呼担夫少停行李路隅余獨從西嶺橫陟之半里遂陟下洞之上隴不甚高然四面皆懸削不可下復稍西下山麓東向行遂得下洞洞門南向門下稍窪其左透崖東出另闢一門門東北向其後旋壑下陷四面寬圓雖窪而不闇既上遂透東門而出稍下從峽中西陟上洞洞門東向前有壘石為垣後亦中窪而下然不甚深其上懸崖雖高中局之玲瓏乳柱之夭矯反不若下洞也既出復從峽中下轉

前隴之嘴而西又經下洞前則前麓皆水草沮如東與野塘相連而此即其上流也忽聞水聲潺潺自下洞前石根透出歷沮如之塢而東潄於野塘者也又從西嶺下半里仍抵路隅呼担與顧奴遂西緣山坳行西望三峰攢列外又有峯遶之心以為異又西四里有寨在南山下又遶其前循之左轉西南半里又踰一坳于是西行峽中其峽南北兩界排闥而前北即所望三峯攢列者但在其內下望反不可見南則有崖高削上有一石

側垂石色獨白而狀如羊是為羊吊崖踰坳至此又一里矣其北崖中斷忽露頂上之峯盤穹矗豎是為唐帽山蓋即前望三峯至是又轉形變象耳按志唐帽在省城南八十里天生橋在金坑司北三十里今天生橋在唐帽東北三十里是天生橋去省反近而唐帽反遠不知當時何以分界也自然言建文君先駐唐帽後往白雲志言其處可以避兵亦幽閼之區矣又西一里餘有峽南向下是為豬槽堡路直西踰小脊而下三里則塢

開南北路交十字於中乃橫截之渡一小水半里有堡
在西山上曰柳家堡又北半里又有堡在北隴上于是
循其右復西上嶺一里將及嶺坳有泉淙淙自土穴出
其色乳白渾而不清踰嶺下共二里復塢開南北仍橫
截之有澗在塢中其水甚小瀦而不流似亦北去者又
西一里復上嶺其嶺南北石峯駢夾中通一坳甚逼一
里越坳而西見西壑中堰水滿陂始以為東出而實不
流之波也循之又西一里則大塢擴然西去陂堰橫障

而北又北循之有村在北山之嘴曰狗場堡乃湯吏部之佃苗也村西平疇一塢為膏腴之壤欲投之宿村人勿納曰西去二里有村亦湯氏佃丁其中可宿乃復西循平疇北隴行一里餘有石峰界平塢中削骨擎空亦獨秀之峭而險者透北峽而西又半里復得一村入叩之其人閉戶遁去又西得一堡強入其中茅茨陋甚而臨處與猪畜同穢蓋此地皆苗熟者雖為佃丁而習甚鄙令人反憶土蠻竹欄為上乘耳

十九日昧爽促苗起作飯忽担人亦呼之余心以為異
謂從來懶不肯起今何以人呼亦呼也蓋此人名王貴
為靖州太陽坪人先是三里抵藍澗彼同數人自後尾
至告曰予儕欲往慶遠苦此路不通迂路又太遠聞叅
府以兵送行故特來附帶余憐而納之途中即以供應
共給之及抵慶遠彼已去及遊南山復遇之遂日日來
候予願隨往滇中余思自慶抵南丹有夫可送至貴州
界恐無担負欲納其一人因與之約曰予此地尚無所

用汝然既隨予亦每日予工價一分若遇負擔處每日予工價三分半彼欲以二人從後聞其儕在南山洞中以絮塞牧牛童子口予心疑之而王貴來言誘童子非伊乃同行者彼已另居於慶已請獨從隨至麻哈遂漸傲慢以橈傷予足及抵貴州見予欲另覓夫復作悔過狀甚堪憐予復用之至是早起忽不見觀余所藏路費亦竟竊之去矣自予行蠻洞中以數金藏鹽筒中不意日久為彼所窺乃不失於蠻烟虺毒之區而失之就担

遵塗之日徒有悵悵而已既明担夫竊貨已去無可奈何求苗子送出平壩不及三十里索價甚遁去不肯出蓋苗習素不送客予求之他苗其人曰彼好意宿汝奈何以担累之須自負去二三里抵九家堡即有送者遍求之其語皆然予無可奈何飯而東担與顧僕共擡而前行由狗場西苗堡截塢堰南過一里踰嶺西下又過一苗堡益轉而南又踰一嶺半里乃西向下半里有溪汪然自南而北始為脊北第一流乃北合洛陽橋下水

東經威清而下烏江者溪上舊有石橋已圯其東半涉
水而渡其西半是為九家堡乃苗之熟者也至是已近
午矣始僱得一夫担而行復西北上隴六里有村在西
山下曰二家堡從其東盤山嘴而北北界山遠闊曠然
直東遙見高峰在四十里外者即志所云馬鞍山威清
之山也路復循南山之北西向入峽二里出峽有村在
南山下曰江清其處山塢大開平疇中拓東有石峰離
立即與南山夾而為所從之峽者也由村東北向抵二

石峯下其峰突屹南面削崖迴裂而無深洞西面有洞
在峰半其門西向亟止苗子令停担峰下予先探其南
面無岩可入惟西南峰下細流汨汨向麓下竅中出遂
從其上躋入洞洞頂甚平間有乳柱下垂若帷帶飄搖
其內分為三層外層即洞門之前曠若堂皇中有圓石
如堆旋而成者四五丈之內即陷空而下其下亦平整
圓拓深約丈五而大倍之從其上下瞰亦頗光明蓋洞
門之光既從上倒下而其底北裂成隙亦透明於外似

可挨入而未及也是為下層下層之東其上復深入成洞與外層對第為下陷所隔不能竟達由外層南壁扳厓而上東透入腋列柱如門頗覺幽暗而玲瓏嵌空詭態百出披竅北下遂達中層則外層之光仍中射而入其內千柱繽紛萬竅靈幻左甚深入而窈窕莫窮前臨下層如在樓閣亦貴筑中所僅見者方扳陟不能去而苗夫在下呼促不已乃出洞而下從洞前北行升陟塍隴二里有東溪自西而東溯之西行有橋十餘輦橫跨

其上是為洛陽橋乃新構而成者橋下流甚大自安順
州北流至此曲而東注威清又北合陸廣志所謂的澄
河是矣度橋北又溯流而西抵水之北來東折處遂從
岐北向溯小溪行始由溪東已涉堰由溪西已復西北
踰崗五里抵銅鼓山塢南關北界石峯聳立皆有洞或
高或下隨峰而出西界則遙山自北而南蜿蜒如屏連
裂三洞其門皆東向而南偏最高敞其前有數十家當
其下即銅鼓寨也是洞名銅鼓洞按志銅鼓山在威清

西四十五里以方隅道里計之似即此山然其地去平
埧僅五里不平埧而威清何也其洞高懸峻裂內入不
甚深而前多突聳之石環牖分門反覺窈窕其右重壁
之上圓穴一規北向高穹拔崖登之其中上盤空頂下
墜深窅土人架木鋪竹為墊儼然層閣頂東透明窻窅
內復有穴自下層出入土人置扉穴前晚則驅牛馬數
十頭藏其中正岩之後有裂竅西南入滴瀝垂其內不
絕漸轉漸隘而暗似向無入者乃出時有一老者候予

洞前余欲并探北中洞老者曰此洞淺不足觀有南洞
在高崖上且大路可由可一登之乃循洞麓西轉不數
十步則峰南果有洞出崖端其門南向其下依崖而居
者猶環之為廬乃從廬後躋級上洞門懸嵌彌高前壘
石為垣若雉堞形內深五丈餘而無懸突之石擴然高
朗其後窪陷而下者一二丈然俱面陽而燦土人置廩
盈其間其左腋裂竅北下漸狹而卑土人曰與東洞通
想即垂瀝不絕處也亦以黑暗不暇入時願僕與苗子

担前行已久予恐其不之待遂下山循麓西上半里踰
坳則顧僕與苗夫猶待於此其坳當西界蜿蜒屏列之
中脊不甚高而石骨稜稜兩旁駢峙甚逼過隘西下塢
中窪其西復有坳環屬蓋南北夾起危峯而東西又兩
脊如屬垣窪中有小水牧者浸牛滿其中度窪半里又
踰脊西下約一里有岐直下西塢者通平塢南上之道
循嶺北越嶺角者為往平塢道乃西北上嶺者一里踰
嶺角而北又北下者一里又踰嶺西北一里與大道值

循大道稍北遂西度田塍共半里踰小橋入平壩東門
半里轉而南乃停担肆中是晚覓得安莊夫市小鯽佐
酒時方過午坐肆樓作記

平壩在東西兩山夾間而城倚西山麓城不甚雄峻而
中街市人頗集魚肉不乏出西門數里有聖泉亦時涸
時溢以迂道不及往

二十日早食隨担夫出平壩南門循西山麓南行二里
有石坊當道其南叢山橫列小溪向東峽去路轉西峽

入三里又隨峽南轉又二里上石子嶺踰嶺為石子哨
又七里過水橋屯又五里為中火鋪又二里西上坳從
坳夾行一里為楊家關又西三里為王宋堡乃東轉四
里為石佛洞洞門西向不深有九石佛甚古

其處西抵大茅河為

安酋界約五十里

又南五里平塢間水分南北流是為老龍過

脊又南五里為頭鋪又南二里西入山坳踰之出其西
又南行三里過一堡又二里上隴入普定北門一岐自
東北來者廣順道一岐自西北者大茅河諸關隘道普

定城垣峻整街衢宏濶南半里有橋又南半里有層樓
跨街市集甚盛

二十一日出南門西南行十五里為楊家橋有堡為楊
橋堡又南十里為中火鋪又南一里抵龍潭山下轉入
西峽西八里有哨轉南七里為龍井鋪又南七里過啞
泉大路從東南下山繞山南入安庄東門小路越嶺西
而南下度小橋抵安庄西門安莊後倚北峯前瞰南隴
而無南門惟東西兩門出入西門外多客肆余乃入憇

焉遂入西門過伍徐二衛舍為言此間為安邦彥所荼毒殘害獨慘人人恨不洗其穴然以天兵臨之蕩平甚易而部院朱獨主撫以致天討不行而叛逆不戢今正月終猶以衆窺三汭河以有脩而退三汭河者又安庄西五十里一水西北自塢撒一水西南自老山中合併東北行故曰三汭東經大茅陸廣烏江與安限為天塹者惟此今設總兵官駐其地時朱總督已斃輿尸還越而按君馮士晉為四川人余離貴省日亦親臨陸廣巡

歷三空將由安庄抵安南伍君曰按君此行亦將巡察
要害分布士卒為勦除之計非與朱為比者不識然否
普定衛城內即安順府所駐予先聞安順止土知州而
官籍有知府節推至是始知所駐在普定也

安庄衛城內即鎮寧州所駐其公署在南城內段公祠
之東湫敞殊甚庭有古杉四株大合兩人抱豈亦國初
之遺耶

安南衛城內即永寧州所駐考一統志三衛三州舊各

有分地衛俱在北州俱在南今州衛同城欲以文轄武
實借武衛文也但各州之地俱半錯衛屯半淪苗孽似
非當時舊境矣

三衛之西為水西所苦其東又諸苗襍據惟中一道通
行耳

段公名時盛天啟四年任鎮寧道雲南普名勝叛踞阿
迷州段統兵征之死於難故州人立祠祀之而招魂葬
於望水亭之西

今普名聲之子
猶據阿迷州

二十二日五鼓大雨達旦予少憇逆旅下午霽獨南遵
大路一里踰嶺由岐東下半里入雙明洞此處山皆迴
環成窪水皆下透穴地將抵洞忽塢中下裂成坑濶三
尺長三文深丈餘水從其東底溢出即從其下北去溢
穴之處其上皆環塍為田水盈而不滲亦一奇也從此
西轉則北山遂南削為崖西山亦削崖北屬之崖環西
北二面如城半規先抵北崖下崖根忽下嵌成洞其中
貯水一塘淵碧深泓即外自裂坑中潛透而匯之者從

崖外稍西即有一石自崖頂南跨而下其頂與崖並起而下闕為門高濶約俱丈五是為東門透門而西其內北崖愈穹西崖之環駕而屬者亦愈合西山之南復分土山一支掉臂而前與東門外崖夾坑而峙昔有結高垣壘石址架閣於上北與東門崖對以補東向之隙而今廢矣由東門又數十步抵西崖下其崖自南山北屬於北崖上皆削壁危合下則中闕而西通高濶俱三倍於東門是為西門此洞外之雙明也一門而中透已奇

兩門而交映尤異其西門之外山復四環成窪高若列城水自東門外崖北澗泓間又透石根溢出西門之東其聲淙淙從西門北崖又透穴西出門之東西皆有小石梁跨之以北入洞水由橋下西行環窪中又透西山之下而去西門之下東映重門北環墜壑南倚南山石壁氤氲結為龕牖置大士像焉由其後透穴南入石竅玲瓏小而不擴深可十餘丈而止此門下南壁之奇也北接北崖石屏中峙與南壁夾而為門屏後則北山中空

盤壑極其宏峻屏之左右皆有小石梁以分達之屏下水環石壑盤旋如帶此門下北壁之奇也北壁一屏南界為門北界為洞洞門南臨此屏中若樹塞遂東西亦分兩門南向水自東門下溢穴而出漱屏根而入則循屏東而駕為東橋而東門臨之又溢穴出西門下循屏西而架為西橋而西門臨之此又洞內之雙明也先從西門度橋入洞頂高十餘丈四旁平覆如幄而當門獨旋頂一規圓盤而起儼若寶蓋中穹其下有石臺中高

而承之上有兩圓窪大如銅鼓以石擊之分清濁聲土
人訖為一鐘一鼓云洞西北盤亘亦多垂柱裂隙俱迴
環不深東南裂隙下高迥亦如西門而掩映彌深水流
其前滌洄作態崆峒清冷各極其趣遂踰東橋仍出西
門下由其前南向而上直躋崖根復有洞東向高濶俱
三丈而深十丈洞後北轉遂上穹而黑然不甚深矣洞
中乾朗有僧棲之而中置金仙像乃扣僧索筆携炬同
下窮西門大士後小穴并錄壁間詩返寓已暮

徐霞客遊記卷五上

欽定四庫全書

徐霞客遊記卷五下

明 徐宏祖 撰

西南遊日記八 貴州

二十三日僱短夫遵大道南行二里從隴頭東望雙明
西崖其下猶透明而東也洞中水西出流壑中從大道
下復西入山麓再透再入凡三穿岩腹而後注於大溪
蓋是中窪壑皆四面山環水必透穴也又南踰阜四升

降共四里有堡在南山嶺頭路從北嶺轉而西下又二里有草坊當路路左有茅鋪一家又西下升陟隴壑共七里得聚落一塢曰白水鋪已為中火鋪矣又西二里遙聞水聲轟轟從隴隙北望忽有水自東北山腋瀉崖而下搗入重淵但見其上橫白濶數丈翻空湧雪而不見其下截蓋為對崖所隔也復踰阜下半里遂臨其下流隨之湯湯西去還望東北懸流恨不能一抵其下担夫曰是為白水河前有懸墜處比此更深予恨不一當

其境心猶歎歎隨流半里有巨石橋架水上是為白虹橋其橋南北橫跨下闢三門而水流甚濶每數丈輒從溪底翻崖噴雪滿溪皆如白鷺飛白水之名不誣矣度橋北又隨溪西行半里忽隴箐虧蔽復聞聲如雷余意又奇境至矣透隴隙南顧則路左一溪懸搗萬練飛空溪上石如蓮葉下覆中剜三門水由葉上漫頂而下如蛟綃萬幅橫罩門外直下者不可以丈數計搗珠崩玉飛沫反湧如烟霞騰空勢甚雄厲所謂珠簾鉤不捲足

練掛遙峯俱不足以擬其壯也蓋余所見瀑布高峻數
倍者有之而從無此濶而大者但從其上側身下瞰不
免神悚而担夫曰前有望水亭可憩也瞻其亭猶在對
崖之上遂從其側西南下復度峽南上共一里餘躋西
崖之巔其亭乃覆茅所為蓋昔望水亭舊址今以按君
道經恐其停眺故編茅為之耳其處正面揖飛流奔騰
噴薄之狀令人可望而不可即也停憩久之從亭南西轉
澗乃環山轉峽東南去路乃循崖拾級西南下又升陟

隴壑四里西上入塢有聚落一區在東山下曰雞公背
土人指其東南峰上有洞西北向外門如豎而內可容
衆有雞公焉以形似名也其洞東透前山而此塢在其
後故曰背余聞之乃賈勇先登冀一入其內比登祇有
一道西南上隨之迤邐扳躋竟無旁岐已一里登嶺頭
矣是為雞公嶺坳中有佛宇問洞何在僧指在山下村
南已越之而上矣担夫亦至遂踰嶺西向下半里抵壑
中又半里有堡在南隴曰太華哨又西上踰嶺而西又

一里乃迤邐西南下甚深始望見西界遥峯自北而南
屏立如障與此東界為夾互相頡頏中有溪流亦自北
而南下嵌壑底望之而下一下三里從橋西度是為關
嶺橋越橋即西向拾級上其上甚峻二里有觀音閣當
道左閣下甃石池一方泉自其西透穴而出平流池中
溢而東下是為馬跑泉乃關索公遺跡也閣南道右亦
有泉出穴中是為啞泉人不得而嘗焉余勺馬跑甘冽
次於惠而高山得此故自奇也但與啞泉相去不數步

何良楷之異如此由閭南越一亭又西上者二里遂陟
嶺脊是為關索嶺索為關公子隨蜀丞相諸葛南征開
闢蠻道至此有廟肇自國初而大於王靖遠至今祀典
不廢越嶺西下一里有大堡在平塢中曰關嶺鋪乃關
嶺守禦所所在也計其地猶在山頂雖下未及三之一
也至纔過午夫辭去余憩肆中

二十四日晨起以乏夫為慮忽有駝騎至尚餘其一遂
倩之議至交水以筐囊裝馬上令之先行余飯而後行

西南七里上北斗嶺一里西踰其脊有亭跨其上西望
崇山列翠又自北屏列而南與東界復頡頏成夾夾中
亦有小水南去從嶺西下二里抵夾塢中有聚落倚其

麓是為北斗鋪

關嶺為中界高山而北斗乃其西陲二界高嶺愈西愈高

由鋪西截

塢橫度二里乃西向拾級上迤邐峯頭五里踰一坳東

眺關嶺已在足底有坊跨道曰安普封疆是為安莊哨

自關嶺為鎮寧永寧分界而安莊衛之屯直抵盤江皆犬牙相錯非截然各判者

又西上峯峽

中三里崖木漸合曰安籠鋪

又永寧屬

按志有安籠箐山安

籠箐闕想即此問所謂安籠守禦所土人云在安南東
南三日程此屬普州又非此矣按此地往昔為安氏西
南盡境故今猶有安庄安籠安順安南諸名蓋安氏之
地昔以盤江為西塹而今以三汊為界三汊以南盤江
以東為中國奮衛者僅此耳由鋪西更南上一里踰嶺
稍下有塢中窪又西半里則重峰夾坑下墜北去盤嶺
側西度坑坳又半里復拾級上二里有菴跨道是為象
鼻嶺由其西度脊甚狹南北俱削壁下而成坑其上濶

僅五六尺如度堵又宛轉北躋再過一脊共三里陟嶺頭則此界最高處也東瞰關嶺西俯盤江以西兩界山俱若列屏於下如川字分行而擁之者嶺西又盤塢為坪結城其間是為查城即所謂鼎站也

有查城驛屬南安鼎站為西

界高山而白雲寺乃其西陲亦愈西愈高乃望之西北下共二里半而稅駕

逆旅趙店

江西人

時駝騎猶放牧中途予小酌肆中而返

憩肆中

其地為盤江以東老龍第一支南分之脊第二支為關

嶺第三支為雞公背支南下形如川字而西支最高然其去俱不甚長不過各盡於都泥江以北其界都泥江北而走多靈者又從新添東南分支下都勻南環獨山州北又東南度雞公關而下者也

其地東南為募役長官司

李姓

東北為營頂長官司

羅姓西

北為沙營長官司

沙姓時沙土官初故其妻即郎岱土酋之妹郎岱率衆攻之人民俱奔走

於龍站

沙營東北為郎岱土酋東北與水西接界與安蔭

表裏為亂攻掠隣境上官惟加銜餌不敢一問也

按是嶺最高西為查城東為安籠箐皆絕頂迴環而成
猶在衆山之上也一統志永寧之安籠箐關正指此普
安之安籠千戶所在安南東南三日程者即與廣西之
安隆長官司接界乃田州白隘所由之道在普安安籠
千戶所當作安隆與廣西同稱不當作安籠與永寧相
潤也

鼎站之峽從東北向西南其東南即大山之脊而查城
倚其西北亦開一峽而去乃沙營土司道也其泉源亦

自東北脊下穿站街而西南墜峽底西南峽脊亦環接無隙遂從其底穿山腹西去當西注盤江者矣

二十五日自鼎站西南行一里餘有崖在路右上下各有洞洞門俱東南向而上洞尤空濶以高不及登路左壑泉已成澗隨之南半里山迴壑盡脊當其前路乃上躋水則自其下入穴盤折二里踰坳脊是為梅子關越關而西路左有峽復墜坑而下東西徑一里而西復迴環連脊路循其上平行而西復踰脊始下陟二里又盤

塢中山西南轉二里復西北上一里是為黃土塢蓋鼎
站之嶺至此中降又與西嶺對峙成峽有土山中突而
連屬之其南北皆墜峽下中踞若垠然其云黃土塢者
以此有數家倚西山而當其坳設巡司以稽察焉又上
踰嶺脊共五里為白雲寺于是遂西南下迤邐四里途
中扛担絡繹車騎相望則臨安道母忠以欽取入京也
司道無欽取之例其牌如此當必有說按母川人本鄉
薦豈果有卓異特達聖聰耶然聞阿迷之僭據未復而

輿扛之紛紜實繁其才與操似俱可議也又至塢底西北上一里為新鋪由鋪西稍踰嶺頭遂直垂垂下五里過白基觀觀前奉真武後奉西方聖人中頗整潔時尚未午駝騎方放牧在後余乃入後殿就淨几以所攜紙墨記連日路紀蓋以店肆雜沓不若此之淨而幽也僧檀波甚解人意時時以茶蔬米粥供下午有象過二大一小停寺前久之象奴下飲瀕去象輒跪後二足又跪前二足伏而後升既而駝騎亦過予方草記甚酣不暇

同往又久之雷聲殷殷天色以雲幕而暗辭擅波以微
禮酬之固辭不受初余以為去盤江止五里耳至是而
知駝騎所期舊城尚在盤江上五里亟為前趨乃西向
直下三里有枯澗自東而西新構小石梁跨之曰利濟
橋越橋度澗南又西下半里則盤江沸然自北南注其
峽不濶而甚深其流渾濁如黃河而甚急萬山之中衆
流皆清而此獨濁不知何故

余三見此流一在武宣入
柳江亦甚濁一在三鎮北

羅木渡則清一在此
復濁想清乃壅時也

循江東岸南行半里抵盤江橋橋

以鐵索東西屬兩厓上為經以木板橫鋪之為緯東西兩厓相距不十五丈而高且三十丈水奔騰於下其深又不可測初以舟渡多漂溺之患壘石為橋亦多不能

成崇禎四年今布政朱

名家民雲南人

時為廉憲命普安游擊

李芳先

四川人

以大鐵練維兩厓練數十餘條鋪板兩重

其厚僅八寸濶八尺餘望之飄渺然踐之則屹然不動日過牛馬千百羣皆負重而趨者橋兩旁又高維鉄練為欄復以細練經緯為紋兩厓之端各有石獅二座高

三四尺欄練俱自獅口出東西又各跨巨坊其東者題

曰天塹雲航督部朱公所標也其西者題曰

四字
缺文

傳宗

龍時為監軍御史所標也傳又豎穹碑題曰小葛橋謂

諸葛武侯以鉄為瀾滄橋數千百載乃復有此故云余

按渡瀾滄為他人乃漢武故事而瀾滄亦無鉄橋鉄橋

故址在麗江亦非諸葛所成者橋兩端碑刻祠宇甚盛

時暮雨大至不及細觀度橋西已入新城門內矣左轉

瞰橋為大願寺西北循崖上則新城所環也自建橋後

增城置所為鎖鑰之要云聞舊城尚在嶺頭五里急冒

雨竭蹶躋級而登一里半出北門又北行半里轉而西

逶迤而上者二里雨乃漸霽

新城內所上者峻城外所上者坦

西踰坳

循右峯北轉又半里則舊城懸嶺後岡頭矣入東門內

有總府鎮焉其署與店舍無異早晚發號用喇叭聲亦

不揚金鼓之聲無有也

青厓總兵姓班三岔總兵姓高此間總兵姓胡添設雖多而勢

不尊是夜宿張齋公家軍人也

二十六日駝馬前發余飯而出舊城西門始俱西南行

從嶺塢升降五里有一二家在南隴下為保定鋪從其

側西上嶺漸陟隆崇三里忽有水自嶺峽下循峽而上

峽中始多田塍蓋就水而成者

時已插時矣

又上二里是為

凉水營由營西復從山塢逶迤而上漸上漸峻又五里

遇駝馬方牧余先發將踰坳坐踰坳下石間少憩望所

謂海馬嶂者欲以形似求之忽有人自坳出負罌汲水

由余前走南岐去余先是望南崖迴削有異而未見其

岐至是亟隨之抵崖下則穹然巨洞其門北向其內陷

空而下甚宏其人入汲於石隙間隨處而是皆自洞頂
淙淙散空下墜土人少鑿坯承之水從洞左懸頂下者
最盛下有石臺承之臺之側鑿以貯汲者洞從右下者
最深內可容數百人而光明不闕然俱無旁隙別竅若
堵牆而成者也出洞仍由舊路出大道登坳即海馬嶂
有真武閣跨坳間余入憩閣間取筆楮記游則駝馬前
去久之乃行其內即為海馬鋪去城十里矣其處北兩
日半程為小米馬場有堡城下臨盤江隔江即水西地

南兩日程為垂場河水漲難渡即出鉛之所也又西循南嶺而行見其塢皆北向墜然多中窪而外橫亘者連西又稍上二平脊共三里則北度而矗者其峰甚高是為廣山其上李芳先新結浮屠為文曲星蓋安南城東最高之巔也又西二里為茶菴其北有山欹突可畏作負隅之勢者舊名歪山今改名威山余望之有異而亟於趨城遂遵大路而西又三里復踰一阜又二里稅駕於安南城之東關外陳貢士家

二十七日駝馬已發余後飯間知城東五里由茶菴而北有威山山間有洞從東透西又有水洞其中積水甚深其前正瞰衛城遙指其處雖在山巔然甚近也乃同顧僕循昨前道五里東抵茶菴遂由岐北向入山一里抵山左腋則威山之脉自北突而南南聳而北伏南削而北垂東西皆巨崖斜騫而南上從南麓復起一小峯亦如之入東峽又一里直抵山後則與東峰過脊處也由脊北下甚深而路蕪由脊西轉循山北峯之半西行

路蕪而磴在循之行則北塢霧霧從塢中起瀰漫北峰
咫尺不可見而南面威山之北惟行處猶朗而巔亦漸
為所籠西行半里磴乃南上拾級而登者半里則峰之
北面全為霧籠矣乃轉東北上則東崖斜騫之上也石
脊甚狹由東北上西南如扳龍尾而升復見東南峰外
澄霄麗日遙山如靛余所行之西北則瀰淪如海峯上
峯下皆入混沌若以此脊為界者蓋脊之東南風所從
來故夙靈淨捲脊之西北風為脊障毒霧遂得以為窟

穴予夙願一北眺盤江從來處而每為峰掩至是適登北嶺而又為霧掩造化根株其不容人窺測如此扳脊半里有洞在頂崖之下其門東向上如合掌稍窪而下

底寬四五丈中有佛龕僧榻

遺飯猶存而僧不知何往

兩旁頗有氤

氲之龕其後直透而西門乃漸狹而低亦尖如合掌其門西徑山腹而出約七丈餘前後通望而下不見者以其高也出後門上下俱削崖疊石路緣崖西南去十餘丈復有洞西向門高不及丈而底甚平深與濶各二丈

而洞後石縷繽紛不深而幻置佛座其中而前建虛堂
已圯其前直瞰衛城若垂趾可及偶霧氣一吞忽漫無
所覩不意海市蜃樓又在山阿城郭也然此特洞外者
也由洞左旁竅東向入其門漸隘而黑板石闕上其中
坎砢嵌窪竇不一皆貯水滿中而不外溢洞頂滴瀝
下注水池如襟珮繁絃鏗鏘遠近洞內漸轉東北勢似
宏深淵墜既水池高下無可著足而無火炬遙燭惟從
黑暗中聽其遙响而已余所見水洞頗多而獨此高懸

衆峯之頂又澗而不流無一滴外洩向所望以為獨石
凌空而孰意其中乃涵水之具耶出洞仍崖而北入明
洞後門抵前洞從僧榻之左有旁龕可登扳而上之則
有隙西透若窓而岐為兩其後復有洞門西向在崖路
之上其門頗敞第透隙處雙楞逼仄祇可外窺不能穿
之以出耳先是予入前洞見崖間有鐫三洞三字者
從洞中直眺但見前後而不知旁觀更有此異也下洞
由舊洞三里出茶菴適按君馮以專巡至從來直指巡

方不踰關嶺盤江馮以特命再任故歷關隘至此耳時
旌旗穿關踰坳瞻眺之空山生色第隨其後抵安南不
免徒騎雜沓五里之程久乃得至乃飲於陳氏肆中遂
入東門西抵衛前轉南而出南門南向行嶺峽間共平
上二里有脊自西北度東南度處東平為塍西忽墜坑
深下有水自坑中唧唧出路隨之西循北崖下隨即所
謂烏鳴關也

烏鳴關在
安南衛

土人呼為老鴉關西向直下一

里有茶菴跨路隅飛泉夾洒道間即前唧唧細流至此

而奔騰矣菴下崖環峽仄極傾陷之勢又曲折下半里
泉益溢道有穹碑題曰甘泉勝蹟其旁舊亦有亭已廢
而遺址豐碑尚在言嘉靖間有僧施茶膳衆由嶺下汲
泉甚艱一日䟽地得之是言泉從僧發者余憶甘泉之
名舊志有之而唧唧細流實溢於嶺上或僧䟽引至此
不為無功若神之如錫卓龍移則不然也又拾級西南
下一里下抵峽口循西崖之口轉而西行北則石崖排
空突岼上壓南則墜壑下盤丘垤縱橫皆犁為田雖升

降已多猶平行山半也又西半里有泉自北崖裂隙間宛轉下注路經其前為架橋橫度泉落於橋內復從橋下瀉峽去坐橋上仰觀之崖隙欹曲泉如從雲葉間墮出或隱或現又瀑布一變格也循崖又西迤邐平上兩過南度之脊漸轉西北共五里為烏鳴鋪復西北下峽間一里餘有小水一自東峽來一自北峽來各有石梁跨之合於路左而東南去度兩石橋又西南上嶺一里從嶺頭過一峭有數十家夾道又從嶺上循北界大山

西向行其南復平墜成壑下盤錯為田甚深其南遙山
與北界環列者聳如展屏而北角獨尖豎而起環此壑
而東度土脊一枝遙屬於北界大山所遇嶺頭夾峭處
正其北屬之脊也余先日從海馬嶂西即遙從嶺隙見
西峰繚繞而此峰獨方頂迥出如屏問騎夫江西坡即
此峰否對曰尚在南余望其坳入處反在北心惑之至
是始知其即東向分支之脊也路雖對之行而西坡實
在其北循北嶺升降曲折皆在峰半行又西北二里西

南二里直墜坡而下者二里緣嶺西轉者一里是為納溪舖蓋在北崖南墜之下雖所下已多而猶然土山之脊也由舖西望則東西山又分兩界有水經其中第此兩界俱支盤隴錯不若關嶺之截然屏夾也復西南下一里半有水從東崖墜坑而出懸細若馬尾從其北路亦墜崖下又二里而抵塢中巨橋三門跨兩隴間水從東一門湧而北出其西二門皆下平為田豈水涸時耶其水自西南諸峽中各趨於橋之南墜峽而下經橋下

北注而出於盤江上流豈納溪之名以此耶度橋復西
北上嶺是曰江西坡以嶺在溪之西也路從夾岡中透
壁盤旋而上一里出夾復拾級上一里得茅菴在坡之
半又北上拾級半里抵嶺頭其北有峰夾塢尚高東望
納溪鋪之綴東崖者高下正與此等于是又西向平陟
嶺間二里挾南峯轉循其西又西向行半里則嶺上水
多左右墜又東北下轉則一深塹甚逼自西南墜東北
若劃山為二者度小石梁而西又西北踰嶺頭共一里

而入西坡城之東南門是為有嘉城

二十八日出西坡城之西北門復西向陟嶺盤折而上
二里始升嶺頭其北嶺尚崇循其南而西又二里望西
北一峰甚近而更聳有霧籠其首以為抵其下矣又西
一里稍降而下忽有脊中度左右復中墜成峽分向而
去其度脊濶僅二尺長亘二三丈而已為東西聯屬之
蒂始知西坡一山正如一芝側出東西徑僅十里南北
兩垂亦不過二三十里而此則其根蒂所接也度脊始

上雲籠高峰又二里盤峰之南是為倪納鋪數十家後

倚高峰南臨遙谷前所望方頂屏列之峰正亘其南指

而詢之土人曰是為兔場營再南為新安二所

新為新城所安

為安籠所即與廣西安籠土司為界者

由鋪之西半里有脊自山前塢中

南度復起山一支繞於鋪前脊東西流水俱東南入納

溪橋之上流者第脊西之流墜峽南搗甚逼又稍北循

崇山而西半里有脊自南嶺橫亘而北中平而不高有

堡樓峙脊間是為保家樓

已為猺羅時守之霞

其脊自西南屏列

而來至此北度東起而為高峯即倪納後之霧籠者西
亘而成石崖即與來脊排闥為夾塢者由脊北循石崖
直西行夾塢之上是為三條嶺西四里石崖垂盡有洞
高穹崖半其門南向橫拓而頂甚平又有一斜裂於西
者其門亦南向而門之中有懸柱焉其前塢中水繞入
西南峽路乃稍降復西上嶺坳共三里為芭蕉關數十
家倚北山南突之坳間水繞突峯之南復北環關西而
出過關則墜峽而下復與水遇是為普安東境之要害

然止鋪舍夾路實無闕也由其西降峽循水路北重崖層突多赭黑之色聞有所謂吊崖觀音者隨崖物色之二里見崖間一洞懸踞甚深其門南向而無路乃扳陟而登則洞門圓僅數尺平透直北十餘丈而漸黑似曾無行跡所入者乃返出洞口則滿地白骨不知是人是畜也仍扳崖下又西有路復北上崖間其下門多牛馬憩息之所污穢盈前其上層有垂柱空其端而置以小石大士乃出人工非天然者復下循大路隨溪又西一

里溪轉北向墜峽去于是復西陟坡阜共六里而至新

興城

自芭蕉關而來所降不多而上亦不遠其塢間溪猶出山上也

入東門出西門亦

殘破之餘也

有碑為天啟四年都御史烏程閔公所復

中有坐鎮守備

是晚按君

宿此又西行嶺峽間二里連踰二嶺脊皆自南北度者忽

西開一深壑中盤旋為田其水四面環亘不知出處路

循東峯西南降一里又轉東南上半里踰嶺脊而南乃

西南下一里西抵塢中聞水聲淙淙甚急忽見一洞懸

北崖之下其門南向而甚高溪水自南來北向入洞平

鋪洞間深僅數寸而濶約二丈洞頂高穹者將十丈直
北平入者十餘丈始西闢而有層坡東墜而有重峽內
亘而有懸柱然漸昏黑不可扳陟矣此水當亦北透而
下盤江者出洞徵洞名於土人對曰觀音洞徵其義以
門上崖端有置大士像於其穴者也洞前溪由東南峽
中來其峽底頗平大葉蒲叢生其間淬綠鍔於風前搖
青萍於水上芄芃有光循之西南半里又西穿嶺隙間
漸循坡躡脊二里有一二家在北峰下其前陷溪縱橫

水由西南破壑去路由西北循嶺上一里出嶺頭是為
蘭家坡西南騁望環山屏列甚遙其中則峰巔簇簇盤
伏深壑間皆若兒孫匍匐成行無與為抗從此乃西北
下直降者二里有菴綴峯頭曰羅漢松以樹名也自踰
新興西南嶺羣峰翠色茸茸山始多松然無喬枝巨本
皆弱幹糾纏垂風拂霧無復吾土凌霄傲風之致也其
前又西南開峽以峽中直下者三里轉而西平行者一
里有城當坳間是曰板橋鋪城當峽口仰眺兩界山

凌空而起以為在深壑中矣不知其西猶墜坑下也路在城外西北隅而入宿城中之西門

二十九日出板橋城之西門北折入大路遂拾級下有小水自右峽下注踰其左隨之行一里則大溪汪然自西南轉峽北注有巨石梁跨其上即所謂三板橋也今已易之石而鋪猶仍其名耳橋上下水皆濶獨橋下石峽中東流急傾湧其水西北自八納山發流經軟橋又西南轉重谷間至是北搗而去亦深山中一巨壑也越

橋西溯溪北崖行溪由西南谷來路入西北峽去于是
升降隴坳屢越岡阿四里直西山皆曠然平伏獨西南
一石峯聳立路乃不從西平下反轉南仰躋半里盤石
峯東南有石奮起路右首銳而灣突肩齊而並聳是曰
鸚哥嘴又西轉而下者一里半有鋪肆夾路曰革納鋪
土音納俱作捺至是而始知所云
捺溪倪捺皆納字也惟此題鋪名又從峽平行緣坡升
降五里有哨舍夾路曰軟橋哨由哨西復墜峽下遙見
有巨溪從西峽中懸迅東注下峽一里即與溪遇其溪

轉向南峽去路從溪北溯溪循北山之麓西行二里有
巨石梁南北跨溪上即所謂軟橋也余初疑冉姓者所
成及讀真武廟前斷碑始知為軟想昔以筏為之今已
易之石而猶仍其名耳度橋而南遂從溪南西向緣南
崖而上其躋甚峻半里平眺溪北山俱純石而綠樹緣
錯成文其中忽有一瀑飛墜自峰頂直掛峽底緣南崖
西上愈上愈峻而北眺翠紋玉瀑步步回首不能去上
二里峽底溪從西北而出嶺頭路向西南而上又一里

過真武廟

按君自新興而
來越此前去

由其西南行遂下塢中又西

南共四里兩越小嶺而下有峽自東南達西北又兩界
山排闥而成者其中頗平遠有聚落當其間曰舊普安

按君飯於鋪館予復先之而西北由塢中行東北界山

逶迤繚繞不甚雄峻西南界山蹢躅離立復露森羅峽

縱離遠然兩頭似俱連脊中平而無洩水之隙者又西

三里有石峯中起分突塢間神宇界其下曰雙山觀

按君

自後來復
越而前去

又西一里則西脊迴環於前遂塢窮谷盡塢

底有塘一方匯環坡之麓四旁皆石峰森森繞塘亦多
石片林立亦有突踞塘中者于是從塘西南上迴坡一
里登其脊又宛轉而行嶺頭嶺左右水俱分瀉深谷北
出者當從軟橋水而入盤江上流南流者當從黃草壩
而下盤江下流又西向從嶺頭升陟其上多中窪之宕
大者盤壑為田小者墜穴為阱共五里為水塘鋪乃飯
於廟間過鋪西下嶺逶迤山半又五里為高笠鋪南向
行隴間踰一平嶺西南下又五里有小溪自北峽來石

橋南跨之度其南北門街夾峙崗上踰崗南下始成市
有街西去為雲南坡大道直南又一小溪自西南峽來
石橋又南跨之橋南即為普安城州衛俱在其中

按君已駐

署中其城西半倚山脊東半下臨東溪南北二門正當

西脊之東麓而東門則瀕溪焉南門外石橋則三溪合
於北徑東門而西環城南又南去而注於水洞者北門
外石橋第一橋即雲南坡之水繞城西北隅而為塹東
下而與北溪合於城東第二橋即小溪自西北來者一

統志所云目前山之水也第三橋即小溪自北來者一

統志所云沙庄之水也三溪交會於城之東北合而南

去是為三一溪經城南橋而入於水洞其城自天啟初

為水西叛逆諸蠻應之攻圍一年而破

後雲南臨安安南土官沙姓者

奉調統兵來復

至今瘡痍未復然是城文運為貴筑之首前有

蔣都憲今有王宮磨

名作遠

非他衛可比州昔惟土官

姓龍

其居在八納山下統十二小土司今土官名子烈年尚少

后設流官

知州姓黃

並治焉州

東北七十里有八納其山高冠一州四面皆石崖嶄絕

非一徑盤旋而上約三十里

龍土官司在其下

其頂甚寬平有

數水塘盈貯其上軟橋之水所由出也土人音以納為

但而梵經有叭旦那之音今老僧白雲

南京人

因稱叭旦那

山遂開大叢林而夷地遠隔尚未證果州南三十里有

丹霞山其山當叢之上更起尖峰卓立於中西界有山

一支西南自平夷衛屏列而北迤邐為雲南坡而東下

結為州治西屏之中其最高處曰睡寺山正與丹霞東

西相對其東界有山南自樂民所分支而北當丹霞山

南十里西界屏列高山橫出一支東與東界連屬合併而北天矯叢沓西突而起者結為丹霞山東北聳突而去者漸東走而為兔場營方頂之山而又東北度為安南衛脉其橫屬之支在丹霞山南十里者其下有洞曰山嵐洞其門北向水從洞中出北流為大溪經丹霞山之西大水塘塢中又北過趙官屯又東轉而與南板橋之水合由洞門溯其水入南行洞腹者半里其洞劃然上透中滙巨塘深不可測土人避寇以舟渡水而進其

中另闢天地可容千人而丹霞則特拔衆山之上石峯

峭立東北惟八納山與之齊抗八納以危擁為雄此峯

以峭拔擅秀昔有玄帝宮天啟二年毀於蠻寇四年不

昧師

徽州人

復鼎建每正二月間四方朝者駢集日以數

百計僧又捐貲置庄田環山之麓

歲入穀三百石

而嶺間則種

豈為蔬

歲可得豈三十石

以供四方但艱於汲水尋常汲之嶺

畔往返三里皆峻級遇旱則往返十里而後得焉

五月初一日余束裝寄逆旅主人符心華寓

蘭溪人

乃南

抵普安北門外東向循城行

先是駝騎議定自關嶺至交水至是予欲往丹霞彼

不能待計程退價余倉卒收行李其物仍為夫盜去窮途之中屢遭撈竊其何堪乎復隨溪南轉

過東門又循而抵南門有石梁跨溪上越其南水從西崖向南谷路從東坡上南嶺西眺水抵南谷崖環壑絕遂注洞南入時急於丹霞不及西下二里竟南上嶺從嶺上行又二里踰嶺轉而西其兩旁山腋多下墜之穴蓋其地當水洞東南其下中空旁透下墜穴皆透穴之通明者也又西南一里路右一峽下迸有岩西南向其

上甚穹乃下探之東門有側竇如結龕門內窪下而中
平無甚奇幻遂復上南行又一里踰嶺脊遂西南漸下
行坡峽間一里過石亭壘址其南路分兩岐由東南者
為新安二所黃草壩之徑由西南者則向丹霞而南通
樂民所道也遂從西南下從嶺峽中平下者二里東顧
峽坑墜處有水透崖南出余疑為水洞所洩之水而其
勢頗小上流似不雄壯從其西遂西南墜坑而下一里
抵壑中則有溪汪然自西而東注小石梁跨其上曰南

板橋

以別於北大道之三板橋也

其下水則西自石洞出即承水洞

之下流至是而復透山腹也水從橋東又合南峽一溪東向而去東北合軟橋下流出北板橋而東與盤江合其南峽之溪則自大水塘南山嵐洞來二溪一北一南皆透石洞而出亦奇矣越南板橋南一里溯南來溪入南峽轉而西行峽中又二里則有壩南北橫截溪上其流湧壩下注濶七八丈深丈餘絕似白水河上流之瀑但彼出天然而此則人堰者也壩北崖有石飛架路旁

若鷁首掉虛而其石分竅連枝玲瓏上透嵌空湊合亦
突崖之一奇也又西三里路緣北崖而上西越之而下
共半里山迴水轉其水又自南向北而來者其先東西
之峽甚束至是峽之成南北者漸寬又循溪西崖南向
行一里南踰一突脊則其南峽開而盤成大塢南望有
石梁橫跨溪上半里度石梁而東遂東南上坡始與南
來之溪別東上半里過一村又東半里轉而南稍下共
半里踰小溪而上過趙官屯遂由屯村北畔東南入塢

二里復上嶺一里轉峽處有水飛墜山腰循山背又西轉而南半里隨峽東入又半里峽中有水自東峽出即飛瀑之上流也小石梁跨峽而南石碑剝落即丹霞山建橋記文也由橋南西向盤嶺為大水塘之道由橋東向溯水而入其下峽中箐樹蒙密水伏流於下惟見深綠一道迤邐谷底又東半里內塢復開中環為田而水流其間路循山南轉半里入竹樹間有一家倚山隈結廬下瞰壑中平疇而棲予以為非登山道矣忽一人出

呼予由其前稍轉而東且導予東南登嶺乃下耕塢中
去及予躋半里復西入樵徑其人自塢中更高呼稍東
遂得平道其處四山迴合東北皆石山突岼而余所登
西南土山則松陰寂歷松無挺拔之勢而偃仆盤曲雖
小亦然遂藉松陰以手掬所携飯搏而食覺食淡之味
更長也既而循坡南上者半里又入峽西上者一里又
南踰坳脊間半里其坳兩旁石峰東西湧起而坳中則
下陷成井灌木叢翳其間杳不可窺已循東峯之南又

轉而東南盤嶺半里其兩旁石峯又南北湧起而峽中
又下陷成窪又稍轉東北路成兩岐一由北踰峽一由
東上峰余不知所從乃從東向而上者其兩旁石峯復
南北湧起半里陟其間漸南轉又半里南向躋其坳則
兩旁石峰又東西湧起越脊南始見西南一峯特聳形
如天柱而有殿宇冠其上乃西南下窪間半里復南上
岡脊迴望所越之脊有小洞一規其門南向其西有石
峯如展旗其東岡之上復起亂峯如湧髻而南岡則環

脊而西遂轟然起丹霞之柱焉其中迴窪下陷底平如鏡已展土為田第無滴水不堪挿蒔由岡西向躋級登峰級緣峯西石崖其上甚峻已而崖間懸樹密蔭無復西日之爍直躋半里始及山門其門西北向而四週籠罩山頂時僧方種豆隴阪間門閉莫入久之一徒自下至號照塵啟門入余遂以香積供既而其師影修至遂憩余閣中而飲以茶蔬影修又不昧之徒也時不昧募緣安南影修留予久駐且言其師在必不放余去以余乃

其師之同鄉也予謝其意許為暫留一日

初二日甚晴霽余時徙倚四面凭窻遠眺與影修相指點其北近山稍伏其下為趙官屯漸遠為普安城極遠

而一峯危突者八納也

相去已百里

其南稍下而橫脊擁其

後為山嵐洞極遠而遙遙隱隔者樂民所之南與亦佐縣為界者也其西墜峽而下為大水塘塢中自南而北山嵐洞之水北出南板橋者也隔溪則巨峯排列亦自南而北所謂睡山矣山西即亦資孔大道而嶺障不

可見其東僅為度脊上堆盤髻之峯稍遠則駢岫叢沓
迤邐東北去為兔場營方頂山之脉者也山東南為歸

順土司

晉安龍土司之屬
與粵西土司同名

越其東南為新安二所黃草

琪諸處與泗城接界矣是日余草紀閣中影修屢設茶

候供以雞菱菜藟漿花

藤如婆婆針線斷其葉蒂輒有
白漿溢出花莖每一二十莖成

一叢莖細如髮長半寸綴花懸
蒂間花色如淡桃花連叢採之黃連頭皆山蔬之有風

味者也

初三日飯後辭影修影修送予以茶醬

粵西無醬貴州
間有之而甚貴

以鹽少故而是山始有醬食

遂下山十里北過趙官屯十里東北過

南板橋七里抵普安演武場由其西橫嶺西度一里望

三一溪北來有崖當其南知洞在是矣遂下則洞門北

向迎溪前有巨石坊題曰碧雲洞天始知是洞之名碧

雲也

土人以此為水洞以其上有佛者為乾洞

洞前一巨石界立門中門分

為二路由東下水由西入入洞之中則擴然無間水循

洞西路循洞東分道同趨南向十餘丈漸昏黑矣忽轉

而東水循洞北路循洞南其東遂穹然大闢遙望其內

光影陸離波响騰沸而行處猶閭閻也蓋其洞可入處已分三層其外入之門為一層則明而較低其內闢之奧為一層則明而彌峻當內外轉接處為一層則暗而中圻稍束如門高穹如橋聳豁不如內層低垂不如外層而獨界其中內外迴眺雙明迥然從暗中伺矚其頂又有一圓穴上透其上亦光明開闢若樓閣中函而無從騰空而上也東行暗中者五六丈而出則堂戶宏崇若阿房未央四圍既拓而峻發彌甚水從東南隅下

搗輿穴而去光從西北隅上透空明而入其內突水之
石皆如踞獅汎鳬附壁之崖俱作垂旂矗柱蓋內輿之
四隅西南為轉入之橋門西北為上透之明穴東南為
入水之深竅而獨東北迴環迴邃深處亦有穴高懸其
前有眚窟下墜黑暗莫窺其底其上有側石環之若井
欄然豈造物者恐人暗中失足耶由窟左循崖而南有
一石脊自洞頂附壁直垂而下痕隆起壁者僅五六寸
而鱗甲宛然或巨或細是為懸龍脊儼有神物浮動之

勢其下西臨流側石畦每每是為十八龍田由窟右循崖而東有一石痕亦自洞頂附壁直垂而下細紋薄影是為蛇退皮果若遺蛻粘附之形其西扳隙而上則明窻所懸也其窻高懸二十丈峻壁峭立而多側痕錯鐫緣之上躋則其門擴然亦北向而出縱橫各三丈餘外臨危坡上倚峭壁即在水洞之東但上下懸絕耳門內正對矗立之柱柱之西南即橋門中透之上層也余既躋明窻旋下觀懸龍蛇脫仍由砦橋下出飯於洞門石

上石乃所鐫詩碑游人取以為臺以供飲饌其詩乃張
渙沈思充者詩不甚佳而渙字極道活可愛鐫碑欲垂
久遠而為供飲之具將磨漶不保矣亟出紙筆錄之仍
入內洞欲一登砮橋上層而崖壁懸峭三上三却再後
仍登明憲東南援蠹柱之腋透出柱南平視砮橋之背
甚坦而近但懸壁無痕上下俱無扳踐咫尺難度于是
復下而出洞日已下舂因解衣浴洞口溪石間半載夙
垢以勝流浣濯之甚快也既而拂拭登途忽聞崖上歌

笑聲疑洞中何忽有人迴矚之乃明窓外東崖峭絕處似有人影冉冉余曰此山靈招我不可失也先是余聞水洞之上有梵龕及至索之無有從明窓外東眺層崖危聳心異之亦不見有扳緣之跡及出水洞覓路旁有小徑隱現伏草間又似上躋明窓者以為此間乃斷崖絕磴耳不意聞聲發闕亟迴杖上躋始向明窓之下旋轉而東拾級數十層復躋危崖之根則裂竅成門其門亦北向內高二丈餘深亦如之左有旁穴前透多裂隙

垂榜僧以石室之為室右有峭峽後坼上頗氤氲盤結而峻不可登洞中有金仙三像一僧栖其間故游者攜樽壘就酌於此非其聲余將茫茫返城不復知水洞之外復有此洞矣酌者僕從甚都想必王翰林子弟予過眺而過之下山循溪溯流二里有大道即南門橋遂從南門入躡山坡北行城中荒敞甚草舍離離不復成行東下為州署門廨無一完者皆安酋叛時城破鞠為丘莽至今未復也出北門還抵逆旅是晚覓夫不得臥

按君

是早反
輟矣

初四日覓夫不得候於逆旅稍散步北寺惟有空樓層閣而寂無人焉乃搆而未就者還悶悶而臥

初五日仍不得夫平明微雨既止而雲油然四布是日為端午市多鬻蒲艾者雄黃為此中所出然亦不見巨塊市有肉而無魚余悶坐逆旅囊中錢盡不能沽濁醪解愁回想昔年雉山之樂已分霄壤

初六日夜雨達旦夫仍不得既午遇金重甫者麻城人

也賈而儒索觀予諸公手卷為予遍覓夫竟無至者
初七日囊錢日罄而夫不可得日復一日不免悶悶是
日金重甫言將往荊州余為作書寄式圍叔下午彼以
酒資奉雖甚鮮而意自可歆

初八日候夫雖有至者而惡主代為捐價即符也錢為
所竊去力阻以去下午得騎亦重價定之無可奈何也
余所遇惡人如衡陽劫盜狗場拐徒併此寓竊錢去者
共三番矣此寓所竊初疑為騎夫後乃知為符主也人
之無良如此夫劫盜拐徒無論如南寧梁冲宇寶檀僧
併此人俱有害人之心予以萬里一身脫其虎口亦幸矣

初九日平明以行李付騎別金重甫乃行是早雲氣穠
郁從普安北門外第一溪橋北循西峽入過稅司前漸
轉西南皆溯小溪西岸行西山崇隆小瀑屢屢從山巔
懸注南五里始西南登坡是為雲南坡初二里稍夷又
一里半甚峻過一脊而西復上坳共一里為馬鞍嶺越
而西遂循嶺西向西南行于是升降在嶺頭盤折皆西
南俱不甚高深五里稍降塢中為坳子哨先是每處有
打哨之苦此
為第一哨今纔奉憲禁
并於一處過無問者
又南越一坳大雨淋漓仍前升

降大峯之西冒雨又十五里而至海子鋪山塢稍開頗
大中有水塘即所謂海子也有小城在其南是為中火
鋪番安廿二哨俱於此并取哨錢過者苦焉

先各哨分
取今并取

於此哨目止勒索駝馬担夫見余輩亦不甚阻撓余乃入
城飯於市復出南門南向登山五里遇駝馬方牧於山
坡雨復大至余乃先行升降高下俱依東大山而南兩
旁多智井墜坑不辨水從何出又五里為大河鋪有水
自鋪東平瀉坡下漫流峽中路隨之而南天乃大霽忽

雲破峰露見西南有山甚高

土人云為黑山

雲氣籠罩時露一

班直上與天齊望而趨五里大河之水已漸墜深塹似
從西北圻峽去路東南緣嶺透峽東下則山環塢合間
中窪為塘水滿其中而四面皆高不知出處又東透坳
下塢間又復窪而成塘與前雖有高下而瀦水莫洩同
之又東緣南峯而轉越其東則東塢大開深盤遠錯千
塢環壑於下度其地在丹霞山南山嵐洞西南余謂壑
底水即北透山嵐者徵之土人云西峯下有入水洞水

墜穴去不知所出從西峯稍下共五里是為何郎舖越
舖南又上嶺仍依東嶺行迴望雲籠高峯已在西北時
出時沒興雲釀雨皆其所為雖山中雨候不齊而衆山
惟瞻其馬首者循東嶺南下峽中有溪自南而來溯之
行其東岸共五里路忽由水渡西岸而暴雨漲流深湧
莫能越方欲解衣赴之忽東山之上大呼者戒莫渡招
予東上嶺行余從之遂從莽棘中上東嶺已得微道隨
之南二里得北來大道果從東嶺上降者蓋涉溪者乃

西道從嶺者乃東道水涸則從西水漲則從東也西流之中有一線深坑涸時橫板以渡茲漲沒無影非其人遙呼幾不免憑河之險矣從東嶺下一里則大道西瀕溪道中水漫數寸仍揭而溯之一里有石梁跨溪上其溪自西南抵東山之麓至是橫折而西從梁下抵西山之麓乃轉北去蓋其源發於西南火燒鋪西分水嶺按志分水嶺在普安西北流經此又北抵黑山何郎之南南百二十里即此不知所洩即土人亦莫能悉也石梁西麓有穴紛駢縱橫

如亦字故名其地曰亦字孔今訛為亦資孔乃土音之
濶也梁南半里即為亦字孔驛有城倚西山下而水繞
其東焉比至雷雨大作宿於西門內周舖

記游太華山

出省城西南二里下舟兩岸平曠夾水十里田盡萑葦
滿澤舟行深綠間不復知為滇池巨流是為草海草間
舟道甚狹遙望西山繞臂東出削崖排空則羅漢寺也
又西十五里抵高嶢乃捨舟登陸高嶢者西山中遜處

也南北山皆環而東出中獨西遜水亦逼之有數百家
倚山臨水為迤西大道北上有傳園西上五里為碧雞
關即大道臨安寧州者由高嶢南上為楊太史祠祠南
至華亭太華盡於羅漢即碧雞山南突為重崖者蓋碧
雞山自西北亘東南進耳諸峯由西南亘東北兩山相
接即西山中遜處故大道從之上置關高嶢實當水埤
焉南一里飯太史祠又南過一村乃西南上山共三里
山半得華亭寺寺東向後倚危峯草海臨其前由寺南

側門出循寺南西上南踰支隴入腋共二里東南升嶺
嶺界華亭太華兩寺中而東突者南踰嶺西折入腋湊
間上為危峯下盤深谷太華則高峙谷東與行處平對
然路必窮極西腋後乃東轉出腋中懸流兩派墜石窟
幽峭險仄不行此徑不見也轉峽又東盤山嘴共一里
俯瞰一寺在下壑乃太平寺也又南一里抵太華寺亦
東向殿前夾堦皆山茶南一株尤巨異前廊南穿廡入
閭東向瞰海然此處所望猶止及草海若漠漠浩蕩觀

當更在羅漢寺南也遂出南側門稍南下循塢西入又東轉一里半南踰嶺嶺自西峰最高處東垂下有大道直上為登嶺道截之東南下復南轉遇石峰嶙峋南擁輒從其北東向墜土坑下共一里又西行叢石中一里復上躡崖端盤崖而南見南崖上下如峰房燕窩累累欲墜者皆羅漢寺南北菴也披石隙稍下一里抵北菴已出文殊岩上始得正道由此南下為羅漢寺正殿由此南上為朝天橋橋架斷崖間上下皆嵌崖此復斬崖

中墜橋渡而南即為靈官殿門北向臨橋由殿東側門

下扳厓躡峻愈上愈奇而樓

供純陽

而殿

供元帝

而閣

供玉皇

而宮

名抱一

皆東向臨海嵌懸崖間每上數十丈得斗大

平崖輒戩空駕隙成之故諸殿俱不崇巨而點雲綴石

互為披映至此始擴然全收水海之勝南崖有亭前突

北崖橫倚樓樓前高栢一株撐空漾翠並樓而坐如坐

桅檣上不復有崖石下藉也抱一宮南削崖上杙木棧

穿石穴棧懸崖樹穴透崖隙皆極險峭度隙有小樓粘

石端寢龕炊灶皆具北菴景至此而極返下朝天橋謁
羅漢正殿殿後崖高百仞崖南轉折間泉一方停崖麓
乃朝天橋逶縫而下者曰勺冷泉南踰泉即東南折其
上崖更崇列中止滌坪一縷若腰帶下悉隤阪崩崖直
挿海底坪間梵宇仙宮雷神廟三佛殿壽佛殿
關帝殿張仙祠真武宮次第連
綴真武宮之上崖愈傑竦昔梁王避暑於此又名避暑
臺為南菴畫處上即穴石小樓也更南則菴盡而崖不
盡穹壁覆雲重崖拓而更合南絕壁下有猗蘭閣址還

至正殿東向出山門凡八折下二里抵山麓有村氓數十家俱網為業村南即龍王堂前臨水海由其後南循南崖麓村盡波連崖勢愈出上已過漪蘭舊址南壁愈拓削一去五里黃石痕掛壁下土人名為掛榜山再南則迴崖突嘴巨石壘空嵌水折成壘南復分接屏壁雄峭不若前而兀特離奇又開異境三里下瞰海涯舟出沒石隙中有結茅南涯側者亟懸仄徑下得金線泉泉自西山透腹出外分三門大僅如盎中空洞悉巨石嵌

仄不可入水由盜門出分注海海中細魚溯流入洞是
名金線魚魚大不踰四寸中腴脂首尾金一縷如線為
滇池珍味泉北半里有大石洞洞門東瞰大海即在大
道下崖傾莫可墜必迂其南始得逶迤入即前所望石
中小舟出沒處也門內石質玲透裂隙森柱俱當明處
南入數丈輒暗覓炬更南洞愈崇拓共一里始轉而分
東西向東上三丈止西入窈窕莫極懼火炬不給乃出
上山返抱一宮問山頂黑龍池道須北向太華中乃南

轉然池實在山南金線泉絕頂以此地崖崇石峻非扳
援可至耳余輒從危崖歷隙上壁雖峭石峯多稜懸躍
無不如意壁紋瓊葩瑤莖千容萬變皆目所未收素習
者惟牡丹枝葉離披布滿石隙為此地絕邁乃結子垂
垂外綠中紅又余地所未見土人以高遠莫知採鑒第
曰山間野藥不辨何物也扳躋里餘遂躡巔則石萼鱗
鱗若出水青蓮平散竟地峰端漸側鐫而南惟西南一
峯最高行峰頂四里凌其上為碧雞絕頂頂南石萼駢

金華山志
卷五
叢南墜又起一突峰高少遜之乃南盡海口山也絕頂
東下二里已臨金線泉之上乃於聳崖間觀黑龍池而
下

記滇中花木

滇中花木皆奇而山茶山鵲為最山茶花大逾碗攢合
成毬有分心卷邊軟枝者為第一省城推重者城外太
華寺城中張石夫所居朶紅樓樓前一株挺立三丈餘
一株盤垂幾及半畝垂者重枝密幹下覆及地所謂柔

枝也又為分心大紅遂為滇城冠山鵲一花具五色花
大如山茶聞一路迤西莫盛於大理永昌境花紅形與
吾地同但家食時疑色不稱名至此則實有紅艷果不
減花也

記游顏洞

臨安府顏洞凡三為典史顏姓者所開名最著余一至
滇省每飯未嘗忘鉅鹿也遂由省中南過通海縣游縣
南之秀山上一里半為灝穹宮宮前巨山茶二株曰紅

雲殿宮建自萬歷初距今纔六十年山茶樹遂冠南土
又南抵臨安府城南臨瀘江此江西自石屏州異龍湖
來東北穿出顏洞而合郡衆水亦以此洞為洩水穴也
于是覓一導游者於城東接待寺顏洞大道當循城而
南度瀘江橋導者從寺前隔江東北小路行遂不得渡
瀘江東觀三溪會合處由寺北循塘岍東行塘東皆紅
蓮覆地密不見水東北十五里度賽公橋水自西北來
東南入瀘又五里上山為金雞峭峭南瀘江會諸水由


此東入峽峽逼甚水傾東抵洞口尚里餘望洞頂石崖
雙壁如門對峙洞正透其下重崗迴夾之不可得見求
土人導入皆曰水漲流急此非游時若兩月前水涸可
不橋而入今即有橋亦不能況無橋耶橋非一處每洞
中水深處輒架木以渡往例按君來游架橋費且百金
他費亦百金土人苦之乘普酋兵變託言洞東即阿迷
境叛人嘗出沒此遂絕官長游洞者余必欲一至洞門
土人曰須渡江南岸隨峽入所謂瀘江橋大道也始悔

為導者誤乃舍水洞覓南明萬象二陸洞從稍東下坡
復上山登頂東瞰峽江環峽東入洞門即在東峽下予
所登山處正與其上雙崖平對門猶為曲掩但見峭崖
西向湧水東傾搗穴吞流之勢已無隱形矣東北三里
踰嶺脊下山二里則極東石壁危聳如環半城下開洞
門北向余知有異從之直下一里抵峽中又一里半抵
東壁下稍南上洞門廓然大書雲津洞蓋水洞中門
也游顏洞以雲津為奇從前門架橋入出後門約四五

里暗中傍水行中忽開門延景其上又絕壁為環故自
奇絕余不能入其前洞而得之重嶠絕巘間且但知萬
象南明不復知有雲津也誠出於意外遂瞰洞而下洞
底水從西南穴中來盤門內而東復入東南穴去余下
臨水湄徑之水濶三丈洞高五六丈而東西當門透明
處徑可二十丈但水所出入直逼外壁故非橋莫行出
水西穴漸暗不可遠窺東為水穴處稍旁拓隔水眺之
中垂列乳柱繽紛窈窕復上出洞外上眺東南北三面

俱環壁無可上仍西出舊道北上山東一里踰嶺已陟東壁廻環上嶺塢中東向一里其地南北各起層峰石崖時突萬象洞即在北崖上乃導者妄謂在南崖下直下者一里抵南崖一洞東向高四丈水從中湧出兩崖角起前對為峽水出洞破峽勢極雄壯蓋水洞後門也又東二里抵老鼠村問諸途人云萬象洞在西北嶺上即前所從下山處洞甚深歷降而下底與水洞通余欲更至洞門晚色已合去宿館尚十里念此三洞慕之數

十年趨走萬里乃至而叛夷阻之陽侯隔之太陽促之
寡人又誤之生平游履斯為最阨矣





徐霞客遊記卷五下